



# ILITSERSUUT

## Akiliunneqarluni angalanerit

ilaannakortumik akiliunneqarluni angalanerit aamma sumiiffiup suliffiugallartup il.il.  
nalinginnaasumillu najukkap akornanni angalanerup akileraaruserneqartarnerat



# AALLAQQAASIUT

---

Akiliunneqarluni angalanerit akileraaruserneqartarnerat pillugu maleruagassat nutaat Inatsisartut, Aningaasarsianit akileraarutit pillugit Inatsisartut inatsisaata nr. 12, 2006-imeersup<sup>1</sup> allangortinneqarneranik Inatsisartut inatsisaanni nr. 11, 1. december 2021-meersumi § 19 b-kkut aalajangiuppaat. Maleruagassat ukioq aningaasarsiorfiusoq 2022 aallarnerfigalugu atuutilerput.

Ilitsersuummi uani pineqarput:

- Akiliunneqarluni angalanerit
- Ilaannakortumik akiliunneqarluni angalanerit
- Sumiiffinnit suliffiugallartuniit il.il. nalinginnaasumik najukkamut angalanerit

Ilitsersuummi pineqarput sulisup sulisitsisuminit akiliunneqarluni angalaneri, tassa angalaneq sulisumut namminermut tunngagaangat. Ilitsersuut aamma atuuppoq inunnut siulersuisuni, ataatsimiisitaliani, isumalioqatigiissitani, siunnersuisoqatigiinni, maalaartarfinni oqartussatulluunniit suleqatigiiffiusuni allani, matumani ilanngullugit Naalakkersuisuni, Inatsisartuni kommunalbestyrelsenilu ilaasortatut qinigaasimasunut taakkunungaluuunniit ikiortaasunut.

Ilitsersuummi uani taaguut "sulisitsisoq" tassaavoq sulisitsisut, suliaqartitsisut, peqatigiiffiit, aktieselskabit, aningaasaateqarfiit, kommunit, sullissiviit, siunnersuisoqatigiit, maalaartarfiit il.il., aningaasarsianik A-nik § 75, imm. 1-imi 2-milu taaneqartunik tunniussaqaqartat uneraritsisussaataitaasullu tamarmik.

---

<sup>1</sup> Allamik allaqqasoqanngippat inatsisinut innersuussinerni tamani pineqarpoq aningaasarsianit akileraarutit pillugit Inatsisartut inatsisaat (kingusinnerusukkut allannguutai ilanngullugit).

# IMARISAI

---

<b>Aallaqqaasiut</b>	2
<b>Maleruagassaq pingaarneq</b>	4
<b>Akilerarusigassaanngitsut</b>	5
Akiliunneqarluni sulinngiffimmi angalaneq akilerarusigassaanngitsoq	5
Atorfinikkiartorluni atorfimmillu soraarluni angalanerit	5
Suliffimmut allamut nuutsitaalluni angalanerit	5
Qanigisaasup perululluni napparsimanerani toquneraniluunniit angalanerit	5
<b>Akiliunneqarluni angalanerit</b>	6
Akiliunneqarluni angalanerit – akileraarutitigut nalinga	6
<b>Sumiiffimmit suliffiugallartumiit il.il. akiliunneqarluni angalanerit</b>	8
Siunertaq	8
Angalanerit pineqartut	8
Akileraarutitigut nalinga	8
Sumiiffik suliffiugallartooq	8
Sumiiffik aalajangersimasumik suliffiusoq, sulisup piffissani sulinngiffimmini najorsinnaanngisaa	10
<b>Ilaannakortumik akiliunneqarluni angalanerit</b>	12
Siunertaq	12
Ilaannakortumik akiliunneqarluni angalanerit qaqugukkut akileraaruserneqassappat	12
Akileraarutitigut nalinga – ilaannakortumik akiliunneqarluni angalanerit	13
Ilaannakortumik akiliunneqarluni angalanerit naatsorsornissaannut assersuutit	13
<b>Piffissaq akilerarusiiffissaq</b>	14
Ukioq aningaasarsiorfiusoq 2022	14
Ukioq aningaasarsiorfiusoq 2023 taassumalu kingorna	14
<b>Sulisitsisup akiliunneqarluni angalanerit il.il. pillugit pisussaaffii</b>	15
Ukioq aningaasarsiorfiusoq 2022	15
Ukioq aningaasarsiorfiusoq 2023 taassumalu kingorna	15
<b>Innersuussinert</b>	16

# MALERUAGASSAQ PINGAARNEQ

---

Sulisut namminerminnut tunngatillugu angalanerannut aningaasartuutit akissarsiatuulli akileraaruteqaataasussaapput, tak. § 13.

Tamanna atuuppoq angalanernut inuup namminerminut tunngatinnerullugu angalanerani siunertaqartunut, soorlu sulisup sulinngiffeqarnerani, sulinngikkallarnissaani imaluunniit qaangiuttoornerminik sulinngiffeqaateqarnerani.

Inuussutissarsiornermi angalanerit tassaapput inuussutissarsiornermut tunngatinnerullugu angalanerit. Inuussutissarsiornermi angalanerit sulisitsisup soqutigisaanut, sulinerullu ingerlanneqarnissaanut atasumik angalaneruppata sulisunut akileraaruteqaataassanngillat.

Sulisup najukkami nalinginnaasumillu suliffimmi akornanni ingerlanneqartarnini nammineq isumagisassaraa. Sulisup ingerlanneqarneranut tassunga aningaasartuutit sulisitsisup akiligarippagit, taakku sulisumut akileraaruteqaataassapput.

Najukkap suliffiullu akornanni angallanneqarneq ima isorartutigippat, allaat angerlarluni unnuinissaq periarfissaqarani, taava tamanna akileraartarnerup tungaanit isigalugu tassaavoq angalaneg.

Akiliunneqarluni angalanerunerani imaluunniit inuussutissarsiornermut tunngasumik angalanerunerani naliliinissami, pisunik ataasiakkaanik ataatsimut naliliineq tunngavigineqartassaaq.

Sulisitsisup sulisorinngisami, soorlu sulisup aappaata qitornaasaluunniit angalanerannut aningaasartuutit akilerpagit, taava taakku sulisumut akileraaruteqaataasussaassapput. Angalanerli taanna § 34, nr. 15 naapertorlugu akileraaruteqaataasussaassanngilaq sulinngiffimmi akiliunneqarluni angalaneruppata, imaluunniit atorfinikkiartorluni atorfimmillu soraarluni angalaneruppata. Immikkoortoq 3, maleruagassami pingaarnemi pineqanngitsunut tunngasoq innersuussutigineqarpoq.

Angalanerit akileraaruteqaataasussat akileraarutigut nalingi sulisitsisup angalanernut aningaasartuutaanut naapertuupput, tak. § 19 b, imm. 1, oqaaseqatigiit siulliit.

Akileraarusiisarneq ajornaannerutinniarlugu Kalaallit Nunaata iluani aammalu avataani ornigassanut, Kalaallit Nunaanniit toqqaannartumik tikiqqarsinnaasunut akiliunneqarluni angalanerit nalingisa qaffasinnerpaaffissaat aalajangersarneqarput, tak. § 19 b, imm. 2. Immikkoortoq 4, akiliunneqarluni angalanernut tunngasoq innersuussutigineqarpoq.

Taavalu sumiiffinnit suliffiugallartuniit il.il. sulisut najugaannut angalanerit ilaat appasinnerusumik akileraaruserneqartarput, tak. § 19 b, imm. 3. Immikkoortoq 5, sumiiffinnut suliffiugallartunut il.il. tunngasoq innersuussutigineqarpoq.

## ***Ilaanakortumik akiliunneqarluni angalanerit***

Ilaanakortumik akiliunneqarluni angalanerit pillugit maleruagassat nutaat ulloq 1. januar 2022 aallarnerfigalugu atuutilersinneqarput. Ilaanakortumik akiliunneqarluni angalanerit tassaapput inuussutissarsiorluni angalanerit, sulisup ullunik sulinngiffiiniq, sulinngikkallarfiiniq qaangiuttoornerminilluunniit sulinngiffeqaateqarfiiniq amerlasuunik imallit, taamaalillutillu akileraaruteqaataasussanngortut, tak § 19 b, imm. 3. Immikkoortoq 6 innersuussutigineqarpoq.

## ***Angalanerit sulisup ilaanakortumik akileeqataaffigisai***

Angalanerit akileeqataaffiusut tassaapput angalasup angalanerimut aningaasartuutit ilaannik akileeqataaffigisai. Tamannattaq ilaanneeriarluni tassaasarpoq ilaanakortumik akiliunneqarluni angalaneg. Taamaattoqartillugu sulisup akiliutai akileraarusigassanit ilanngaartigineqartassapput.

# AKILERAARUSIGASSAANNGITSUT

---

## **Akiliunneqarluni sulinngiffimmi angalaneq akileraarusigassaangitsoq**

Ukiunut ataasiarluni akiliunneqarluni sulinngiffimmi angalaneq maleruagassat tjenestemandinut atuuttut malillugit pippat akileraaruserneqartussaangilaq, tak. § 34, imm. 1, nr. 15. Sulisoq arlaleriarluni akiliunneqarluni sulinngiffimmi angalappat, taava angalanerup ataatsip saniatigut angalaneq (angalanerit) akileraaruserneqassapput.

Akiliunneqarluni sulinngiffimmi angalanerit akileraaruteqaataasussaangitsut suunerinut tunngatillugu innersuussutigineqarpoq Akileraartarnermut Aqutsisoqarfiup akiliunneqarluni sulinngiffimmi angalasarnerit akileraarusersorneqartarnerinut ilitsersuutaa 25. april 2008-meersoq.

## **Atorfinikkiartorluni atorfimmillu soraarluni angalanerit**

Atorfinikkiartorluni atorfimmillu soraarluni angalanerit tassaapput atorfinitsitaanermit atorfimmillu soraarnermit najukkap sumiiffiullu suliffigisap akornanni angalanerit.

Angalaneq tassaassaaq sulisup najugareqqaagaaniit sumiiffimmut suliffigisassaanut, sulisup najugariligassaanut angalaneq.

Atorfinitsinneqarnissaq siunertaralugu angalatinneqarnerit atorfinikkiartorluni atorfimmillu soraarluni angalanertut isigineqangillat, tassaasinnaallutilli nuutsitaalluni angalaneq, tak. 3.3.

Atorfinikkiartorluni atorfimmillu soraarluni angalanernut aningaasartuutit sulisup angalaneranut aningaasartuutitut isigineqarput, taamaammallu akileraaruteqaataasusasaanatik. Atorfinikkiartorluni atorfimmillu soraarluni angalanernut ilaapputtaa katissimallugu apparisap, inooqatigisap qitornallu 18-it inorlugit ukiullit, sulisup inoqutigisaasa angalanerit. Angalanerup atorfinikkiartorluni atorfimmilluunniit soraarluni angalanertut isigineqarnissaani sulisup inoqutaasalu ataatsikkut angalasimanissaat piumasaqaataangilaq.

## **Suliffimmut allamut nuutsitaalluni angalanerit**

Nammeneq qinnutigalugu peqquneqarluniluunniit nuunnermit angalanerit atorfinikkiartorluni ator-fimmillu soraarluni angalanertut isigineqassapput. Angalanerit taakku sulisitsisup soqutigisai aal-laavigalugit pisutut isigineqassapput, taamaammallu angalaneq angalasumut akileraaruteqaataas-saangilaq.

## **Qanigisaasup perululluni napparsimanerani toquneraniluunniit angalanerit**

Sulisup qanigisami perululluni napparsimanerani, qanigisap toqujartornerani imaluunniit toqunerani/ilisaanerani najuukkiartorluni angalaneranut aningaasartuutit sulisitsisumit akilerneqarsinnaapput.

Angalanerit taamaattut angalasumut akileraaruteqaataasussaanginnerat qangaaniilli periusiuvoq. Inatsisip 2021-mi allangortinneqarnera periutsimik taassuminnga allannguissamik siunertaqangilaq.

# AKILIUNNEQARLUNI ANGALANERIT

---

Akiliunneqarluni angalanerit nalingisa qaffasinnerpaaffissaat § 19 b, imm. 2-mi pineqarput.

Akilerarusiineq naliliussat aalajangersarneqartut malillugit pissaaq, angalanermut aningaasartuutaasimasut naliliussanit qaffasinnerugaluarpataluunniit.

Angalanerup naliliussanit appasinnerusumik akeqarsimanera uppersarneqarpat aningaasartuutit sulisitsisumit akilerneqarsimasut kisiisa tunngavigalugit akilerarusiisoqassaaq.

Akiliunneqarluni angalanerit nalinginik, naliliussat § 19 b, imm. 2-mi taaneqartut malillugit akilerarusiinissami taamaallaat pineqarput sulisup sumiiffiup suliffigisami aamma najukkami, imaluunniit Københavnip akornanni akiliunneqarluni angalaneri. Københavnimut taarsiullugu ornigaq alla Kalaallit Nunaanniit timmisartorluni toqqaannartumik tikinneqarsinnaasoq toqqarneqarsinnaavoq, tassunga angalanerup akia Københavnimut angalanerup akissaraluanit qaffasinnerusimangippat.

Angalaneq § 19 b, imm. 2-mi pineqartunut ilaangippat, taamaalillunilu akilerarusigassaappat akileraartartoq sulisitsisup angalanermut aningaasartuutai tunngavigalugit akilerarusiiffigineqassaaq.

## **Akiliunneqarluni angalanerit – akilerarutitigut nalinga**

Akiliunneqarluni angalanerit akilerarutitigut nalingisa qaffasinnerpaaffissaat § 19 b, imm. 2, nr. 1-imiit 3-mut allasimapput.

Ukiumi aningaasarsiorfiusumi 2022-mi nalingisa qaffasinnerpaaffissaat tassaapput:

- inuup ataatsip akiliunneqarluni angalaneranut ataatsimut kr. 17.680.
- meeqqamut 2-niit 11-nut ukiulimmut ataatsimut kr. 8.840.
- meeqqamut sulilunniit ukiuqalersimangitsumut ataatsimut kr. 1.760.

Naliliussat procenti aaqqiissutissaq malillugu ukiumoortumik aalajangersarneqartarput, ukiorlu aningaasarsiorfiusoq naliliussat atuuffissaat sioqqullugu kingusinnerpaamik ulloq 10. oktober Akileraartarnermut Aqutsisoqarfimmit tamanut nalunaarutigineqartarlutik.

Kalaallit Nunaata avataanut kiisalu ornigassanut Kalaallit Nunaanniit toqqaannartumik tikinneqarsinnaangitsunut angalanernut akileraruteqaataasussanut aningaasartuutit imatut angissusilerneqassapput:

## *Assersuut*

---

Qaanaami sulisoq Australiamut akiliunneqarluni angalavoq. Angalaneq tamarmi 40.000 koruuninik naleqarpoq. Qaanaamiit Københavnimut uterlugulu angalaneq 20.000 koruuninik akeqarpoq. Københavnimiit Australiamut uterlugulu angalaneq 20.000 koruuninik akeqarpoq. Angalanerup akilerarutitigut nalinga ukiumi aningaasarsiorfiusumi 2022-mi (Qaanaamiit Københavnimut uterlugulu 17.680 kr. + 20.000 kr. =) 37.680 koruuniuvoq.

Naliliussanut taamaallaat ilaassapput billetsinut aningaasartuutit, angalanermut pilersaarut malillugu unnuisariaqarneq aamma mittarfinnut akitsuutit ilanngullugit.

Aningaasartuutit allat, soorlu biilnik attartorneq, neriniartarfimmi nerineq, aasarsiorarfimmik attartorneq, charterferie il.il. ilanngunneqassanngillat, taakku aningaasartaasa qaffasinnerpaaffissatut killiliussaqaq inoraluarpassulluunniit. Aningaasartuutit taamaattut sulisitsisumit akilerneqarsimappata, sulisoq aningaasartuutitut sulisitsisup akiligaanut immikkut akilerarusiiffigineqassaaq.

### *Assersuut*

---

Sulisoq, taassuma aappaa meeralu 9-nik ukiulik Uummannamiit Københavnimut uterlugulu akiliunneqarlutik angalapput. Angalaneq katillugit 50.000 kr.-inik naleqarpoq, ilaqutariit siumut utimullu Ilulissani akunnittarfimmi unnuineri ilanngullugit.

Ukiumi aningaasarsiorfiusumi 2022-mi akileraarutitigut nalinga katillugu 44.200 kr.-iuvoq (17.680-it marluk taavalu 8.840)

Sulisitsisup angalanermut aningaasartuutaasa ilaat sulisup utertillugit akilerpagit, akileraaruserne-qartussaq tassaavoq angalanerup akiviata aningaasallu sulisup utertillugit akiligaasa nikingassutaat, taamaattorli naliliussat qaffasinnerpaaffissaat qaangernagu.

### *Assersuut*

---

Sulisoq Tasiilamiit Upernavimmut uterlugulu 25.000 koruuninik nalilimmik akiliunneqarluni angalavoq.

Akiata affaa sulisup sulisitsisumut utertillugu akilerpaa (12.500 kr.).

Angalanerup akia (25.000 kr.) ukiumi aningaasarsiorfimmi pineqartumi naliliussap qaffasin-nerpaaffissaanit 17.680 kr.-iusumit qaffasinnerummat sulisoq naliliussap qaffasinnerpaaffis-saa tunngavigalugu akileraaruserneqassaaq. Sulisup akiliutaa ilanngaatigineqarsinnaammat angalanerup akileraarutitigut nalinga tassaalerpoq (17.680 kr.- 12.500 kr. =) 5.180 kr.-it.

Pissutsit immik ittut atuuppata, soorlu iluanaarniutiginninniartoqarpat, taava naliliussat qaffasin-nerpaaffissaat qulaani taaneqartut atuutsinngitsoorneqarsinnaapput. Taamaattoqartillugu aningaa-sartuutit sulisitsisumit akilernerqarsimasut tunngavigalugit akileraarusiisoqassaaq.

### Siunertaq

§ 19 b, imm. 4-p imarai § 19 b, imm. 1-imi 2-milu pineqartunut ilaanngitsut. § 19 b, imm. 4-mi pineqartunut ilaapput inuit sumiiffinnut suliffiugallartunut imaluunniit suliffinnut immikkut ittunut aallartinneqarsimasut.

Aalajangersakkap siunertaraa angalanerit, ”inuit kommunit aggornerisa avataanniittut il.il.” pillugit malerugassani immikkut ittuni, Akileraartarnermut Aqutsisoqarfiup nalunaarutaaniittuni maannamut ilaatinneqartut akileraaruserneqartarnerannik aalajangersaanissaq.

### Angalanerit pineqartut

Aalajangersakkami pineqarput sulinngiffeqarneq peqquutigalugu akiliunneqarluni angalanerit. Pineqarput sulisup sulinngiffeqarnermini qaangiuttoornerminillu sulinngiffeqaateqarnermini angalanerit.

Akiliunneqarluni angalaneq § 19 b-mi pineqartunut ilaanersaq pisuni ataasiakkaani ataatsimut naliliineq tunngavigalugu peqqaassaaq, kingornalu nalilerneqassalluni angalaneq § 19 b, imm. 4-mi pineqartunut ilaanersaq.

Aalajangersakkami taamaallaat pineqarput sulisut ukunani sulisuusut:

- Sumiiffiit suliffiugallartut, imaluunniit
- Suliffiit aalajangersimasut, sulisup piffissani sulinngiffiusuni najorsinnaanngisai.

Pisuni marluusuni tamaginni piumasaqaataavoq angalanerimi ornigassaq tassaassasoq sulisup nalinginnaasumik najugaa.

Ornigassanut allanut nalinginnaasumik najugarinngisanut angalanerit maleruagassami pineqartunut ilaanngillat, taamaammallu akiliunneqarluni angalanerit pillugit maleruagassat nalinginnaasut malillugit suliarineqassallutik.

Sulisoq nalinginnaasumik najugaqarfeqanngippat, taava angalaneq § 19 b, imm. 4-mi pineqartunut ilaassanngilaq. Taamaammatt angalaneq akiliunneqarluni angalanerit pillugit maleruagassani nalinginnaasuni pineqartunut ilaatinneqassaaq, taamaattoqartillugumi sumiiffik suliffiusoq nalinginnaasumik najukkatut isigineqassammat.

### Akileraarutitigut nalinga

Angalanerit maleruagassami pineqartut angalanerimut ataatsimut (siumut-uterlugulu) 2.000 koruuninik nalilittut akileraaruserneqassapput.

Akiliunneqarluni sulinngiffimmi angalanerit akileraaruteqaataasussaannngitsut pillugit maleruagassat atuutiinnarmata aalajangersakkami pineqartut tassaapput, akiliunneqarluni ukiumut ataasiarluni sulinngiffimmi angalanerup saniatigut angalanerit.

### Sumiiffik suliffiugallartoq

Sumiiffik suliffiugallartoq tassaasinnaavoq sanaartugassaq. Tassani aalajangiisuussaaq sanaartugassap piffissami siumut killiligaareersumi ingerlanneqarnissaa aammalu sanaartugassap annertussusiata nalunnginneqareernissaa.

Sumiiffik suliffiugallartoq pillugu aalajangersakkami pingaarnertut pineqarput sanaartugassat angi-suut, sulisut sumiiffimmi suliffiugallartumi sulisitsisoqarlutik suliffigisaat.



Sanaartugaq angisooq piffissami sivisuumi suliaasinnaammat, sulisut sanaartukkap ingerlanneqarnerani nalinginnaasumik najukkaminnut akiliunneqarlutik angalarput, angalanerullu siunertaa tassaasarluni sulinngiffeqarneq. Sanaartugaq angisooq aalajangersakkami pineqartunut ilaanersoq pisuni ataasiakkaani naliliiffigineqartassaaq. Sanaartukkat ikinnerpaamik 500 mio. kr.-inik akillit sanaartukkatut angisuutut isigineqassapput. Imaanngilarli sanaartukkat 500 mio. kr.-it inorlugit akillit aalajangersakkami pineqartunut ilaasinnaassanngitsut. Tamatumani aalajangiisuussaaq piffissaq sanaartorfiusoq qanoq siviutiginersoq, matumani aamma apequtaalluni sanaartugaq sulisunik nikittaallutik sulisunik sulisoqarnikkut ingerlanneqarneresoq, tassa imaappoq sulisut ataasiakkaat suliarlutik sulinngiffeqartarnersut/qaangiuttoornerminnik sulinngiffeqaateqartarnersut, taamaalioreeraangamillu sanaartukkami tassani sulinertik nangittarneraat, kiisalu angalanerit sulisitsisumit akilerneqartarnersut.

Tassani aalajangiisuussaaq sanaartugassap piffissami siumut killiligaareersumi ingerlanneqarnissaa aammalu sanaartugassap annertussusiata nalunnginneqareernissaa. Sanaartugaq naammassippat sulisoq illoqarfimmi nunaqarfimmiluunniit allami suliffimmut tassaniittumut allamut nuussaaq. Sulisup illoqarfik nunaqarfillunniit (sumiiffigisami) qimannagu sanaartukkani allani sulilerpat, tamanna aalajangersimasumik suliffittut isigineqassaaq. Taava angalanerit sulisitsisumit akilerneqartut maleruagassat nalinginnaasut malillugit akileraaruserneqartassapput. Aalajangersakkami pineqanngillat sanaartugassat mikisut piffissamilu sivikitsumi suliassat.

Aalajangersakkamissaaq pineqartunut ilaanngilaq sulisup, sanaartukkap angisuup naammassineqarnerata kingorna sumiiffimmiiginnarluni sanaartugassanik allanik suliaqalenera. Taamaattoqartillugu sumiffik suliffiusoq tassaajunnaassaaq sulisup *sumiiffik suliffigigallagaa*.

#### *Assersuut 1: sumiiffik suliffiugallartoq – sanaartugaq angisooq*

A Islandimi najugaqarpoq, entreprenørímilu E A/S-imi sulisuulluni. A sanaartugassami angisuumi Nuummi sananeqartussami sulisussatut aallartinneqassaaq. A sanaartugassap betonngitassaanik qaammatini 8-ni suliaqassaaq. Sulineq nikittaalluni ingerlanneqassaaq, sapaatit akunnerini 6-ini suliarluni sapaatit akunnerini 3-ni sulinngiffeqartoqarluni, sanaartugassap ilaata A-p suliassaata naammassinissaata tungaanut. A-p najukkaminut siumututimullu februaarimi, apríilimi aamma juunimi angalanissai akilerneqassappoq. Angalanissat siunertaraat sulisup sulinngiffeqarnissaa. Tamatuma kingorna suliassaq naammassissaaq, A-lu juulimi Islandimut utissalluni.

A-p sumiiffik suliffigigallagassaa matumani pineqarpoq, sanaartugassarlu angisuujulluni. Taamaammat angalanissat § 19 b, imm. 4-mi, sumiiffinnut suliffiugallartunut tunngasumi pineqartunut ilaapput.

Februaarip qaammataani angalanissaq, akiliunneqarluni sulinngiffimmi angalanerit akileraaruteqaataasussanngitsut pillugit aalajangersakkami pineqartunut ilaassaaq, tak. § 34, imm. 1, nr. 15, taamaattumik angalaneq taanna akileraaruteqaataassanngilaq.

Sanaartugassap aallartinnerani sumiiffimmut suliffissamut angalanissaq, A-llu suliassaata naammassinerani angerlamut angalanissaq inuussutissarsiornermi angalanertut isigineqassapput.

Taamaammat A-p 2022-mi apríilimi juunimilu akiliunneqarluni angalaneri (2 x 2.000 kr.=) 4.000 koruuninik nalilittut akileraaruserneqassapput.

#### *Assersuut 1-imut nassuiaatit:*

A suliassap naammassereernerata kingorna Nuummi sanaartugassami allami sulisussanngorlugu nuutsinneqarpat, A § 19 b, imm. 4-mi maleruagassani immikkut ittuni pineqartunut ilaatinneqarunnaassaaq, tassami suliassap annertussusia nalunnginneqareersussaaq. Taava A kingusinnerusukkat akiliunneqarluni angalassaguni § 19 b, imm. 1-imi 2-milu maleruagassat nalinginnaasut malillugit akileraaruserneqartussaassaaq. Akerlianik A sumiiffimmi allami sanaartugassamik nutaamik suliaqartussaannngorlugu aallartinneqarpat, suliffiusussaq nutaaq taanna § 19 b, imm. 4-mi pineqartunut ilaatinneqarsinnaassaaq.

## *Assersuut 2: inuussutissarsiornermi angalanerit*

B Nuummi najugaqarpoq, entreprenørimilu E1 A/S-imi Nuummittumi sulisuulluni. B 2022-mi martsimi Ilulissanukarpoq silaannarissarfinnik ikkussuiartorluni. B sapaatit akunnerini 5-ini Ilulissaniippoq, kingornalu Nuummut uterluni. B 2022-mi majimi sapaatip akunnerani ataatsimi Ilulissaniippoq kukkunernik iluarsiiartorluni silaannarissarfiillu eqqortumik ingerlanerinek uuttortaajartorluni, kingornalu Nuummut uterluni.

B 2022-mi junimi sapaatit akunnerini 5-ini Ilulissani suliassanik allanik suliqariartorluni Ilulissanukaqqippoq. B piffissani Nuummiiffimmini E1 A/S-imi nalinginnaasumik sulivoq.

Angalanerit suliassat isumagineqarnissaannik siunertaqarmata, angalanerit inuussutissarsiornermi angalanertut isigineqarput, taamaattumillu B-mut akileraaruteqaataasussaantik.

### **Sumiiffik aalajangersimasumik suliffiusoq, sulisup piffissani sulinngiffimmini najorsinnaanngisaa**

Sumiiffiit aalajangersimasumik suliffiusut, sulisut piffissani sulinngiffimmini najorsinnaanngisaat tassaatinneqarput sumiiffiit sulisut piffissani sulinngiffimmini najorsinnaanngisaat, tassa isumannaallisaaneq taamatullu aamma sumiiffimmi init atugassiissutaasut pissutigalugit.

Pineqartunut ilaasut assersuutigalugu makkunani sulisuupput:

- Aatsitassarsiornermik suliit sumiiffiit inoqarfiusut ungasissuiniittut
- Pituffimmi (Thule Air Base) sulisut

Sumiiffimmi suliffiusumi isumannaallisaanerup, tasanilu init atugassiissutaasut pissutigalugit sulisut piffissani sulinngiffimmini tassaniissinnaassannginnersut sulisitsisup aalajangigassaraa.

Aalajangersakkamili pineqanngilaq illoqarfimmi nunaqarfimmiluunniit aalajangersimasumik suliffik, sulisoq inini sulisitsisup atugassiissutaani najugaqaraluarpuunniit. Taassuma sumiiffik aalajangersimasumik suliffiusoq, isumannaallisaaneq inillu atugassiissutaasut pissutigalugit sulisunit, piffissani sulisut sulinngiffianni najorneqarsinnaanngitsoq assiginngilaa, sulisummi piffissani sulinngiffimmini illoqarfimmi nunaqarfimmiluunniit najugaqarnissaat akornutissartaqanngilaq. Pisuni taakkunani aalajangiisuusut tassapput sumiiffimmi pissusiviusut, imaanngitsoq sulisitsisup init il.il. atugassiissutigineqartut qanoq atorineqarnissaannik aalajangersaasimanera.

Sumiiffiit suliffiusut inoqarfinniittut taakkuluunniit qanittuiniittut pineqartillugit, akiliunneqarluni angalanerit akileraaruserneqartarnerat pillugu maleruagassat nalinginnaasut malinneqassapput, tassa sumiiffik suliffiugallartoq pineqanngippat.

### *Assersuut: Piiaavik*

Piiaavik inoqarfimmit qaninnermit imaatigut ornissallugu 60 km-inik ungasitsigisumiippoq. Sulineq nikittaalluni sap.ak. pingasuni suleriarluni sap.ak. ataatsimi sulinngiffeqartarluni ingerlanneqarpoq. Sulisut piiaaviup inoqarfiullu qanittumiittup akornanni angallanneqarnerat sulisitsisup umiatsiaanik pisarpoq. Taava ingerlaqqissagaanni tamanna pisortat timmisartoqarfiutaannit timmisartorluni pisarpoq.

A piiaavimmi sulisuusoq qaartitsisarnermillu aqutsisuusoq inoqarfimmi qanittumiittumi najugaqarpoq. A sap.ak. pingasuni sulereeraangami inoqarfimmut angallammik siumut utimullu akiliunneqarluni angalasarpoq. A-p angalanera akiliunneqarluni angalanertut isigineqassanngilaq, angalanermi inoqarfimmut qaninnermut angalaneruvoq, aatsaallu tassanngaanniit angalanissamut pisortat periarfissiissutaat aqputigineqarsinnaammata.

B qamutininik qillerutininik ingerlatsisutut atorfeqartoq Sisimiuni najugaqarpoq, taamaammallu allatuulli inoqarfimmut qaninnermut angallammik angallanneqartarluni, taassumalu saniatigut najukkaminut timmisartumik (siumut utimullu) angalasarpoq sulisitsisup akiligaanik. B-mut tassaapput akiliunneqarluni angalanerit § 19 b, imm. 4-mi pineqartut, taamaammallu akiliunneqarluni angalanerit, ukiumoortoq ataaseq kisiat pinnagu, siumut utimullu angalanermut ataatsimut 2.000 kr.-inik nalilittut akileraaruserneqassapput, sulisitsisup aningaasartuutaa appasinnerusimanngippat.

### *Piiaavik inoqarfiup qanitaaniittoq pillugu assersuummut nassuiaatit:*

Piiaavimmiit inoqarfimmut angalaneq timmisartumut qulimiguulimmut suluusalimmulluunniit ilaalluni pippat, tamanna angalanerit akileraaruserneqarnissaannut sunniuteqassanngilaq. Tamanna soorlu pisinnaavoq piiaavik Nunami allanngutsaaliukkamiippat, sulisullu Nerlerit Inaannut timmisartuunneqartarpata. Sulisut Nerlerit Inaanni nalinginnaasumik najugallit angalanerat akileraaruserneqassanngilaq. Tamannattaq angalanerup inoqarfimmut qaninnermut angalaneruneranik, aatsaallu tassanngaanniit angalanissamut pisortat periarfissiissutaasa aqputigineqarsinnaanerannik pissuteqarpoq.

Sulisulli Kalaallit Nunaanni avataaniluunniit nalinginnaasumik najukkaminut ingerlaqqinnerminni angalanerat sulisitsisumit akilernerqartoq § 19 b, imm. 4 naapertorlugu akileraaruserneqartussaassaaq.

# ILAANNAKORTUMIK AKILIUNNEQARLUNI ANGALANERIT

Ilaannakortumik akiliunneqarluni angalanerit § 19 b, imm. 3 naapertorlugu akileraaruserneqassapput.

## Siunertaq

Ilaannakortumik akiliunneqarluni angalanerit susoqarnera tunngavigalugu akileraaruserneqarnissaat § 19 b, imm. 3-mi aalajangersarneqarpoq, tassa angalanerimi ullut sulisup namminerminut tunngasunut aammalu sulinermit tunngasunut atugai apeqquaatillugit.

Angalanerit siunertanik marluusunik imaqartillugit, angalanerit pingaarnertut siunertaannik missingersuilluni naliliisarneq maleruagassat ilaannakuusumik taarserpaat. Inuussutissarsiornermi angalanerit sulisup sulingiffeqarneranik il.il. ima annertutigisumik imaqarpata, allaat akileraaruserneqarnissamat piunnaqqaatnik naammassinnillutik, taava ilaannakortumik akiliunneqarluni angalanertut siunissami isigineqarsinnaalissapput.

## Ilaannakortumik akiliunneqarluni angalanerit qaqugukkut akileraaruserneqassappat

Ilaannakortumik akiliunneqarluni angalanerit piunnaqqaatit marluusut arlaat ataaseq naammassineqarpat akileraaruserneqassapput:

- Ullut sulingiffimmut, qaangiuttoornerit sulingiffeqaatiginerinut, sulingikkallarnermut siunertanulluunniit namminermit tunngasunut assigisaannut atorneqartut amerlassusii ullut aallaqqaffiusut 50 procentii sinnerlugit amerlassuseqarpata, imaluunniit
- Ullut siunertanut namminermit tunngasunut atorneqartut ullunit atasuinnarnit 5-init amerlaneruppata.

Tamatuma saniatigut piunnaqqataavoq namminermit tunngasup nalinga minnerpaamik 1.000 koruuninik annertussuseqassasoq.

Ullut ilivitsut tunngavigalugit naatsorsuisoqassaaq.

Ullut inuussutissarsiornermit tunngasunut atorneqartut tassaatinneqarput ullut sulisitsisup soqutigisaanut atorneqartut. Ulloq ataatsimiiffiusimappat ulloq taanna inuussutissarsiornermit tunngasunut atorneqarsimasutut isigineqassaaq, aatsaalli iluanaarniartoqarsimanngippat/avaqqutaariniartoqarsimanngippat.

Sulisoq sulingiffimmi nalaani sulinermit attuumassutilimmik oqarasuaatikkut sianerfigineqarnissamat imaluunniit e-mailinik piffissat ilaanni atuarnissamat akissuteqarnissamullu piareersimasimappat, tamanna ullup inuussutissarsiornermit atorneqarsimasutut isigineqarnissaanik kinguneqassanngilaq.

Ulloq taanna sulisup sulingiffeqarnermit naatsorsuutaani/aningaasarsianut naatsorsuutini sulingiffittut/qaangiuttoornerit sulingiffeqaateqarnertut il.il. nalunaarsorneqarnerisooq, kiisalu sulisoq ullunut pineqartunut aningaasarsiaqartinneqarnerisooq pingaartinneqartunut ilaassapput.

Sulisumut namminermit tunngasup akileraarutitigut nalinganik naatsorsuinermit ullut angalaffiusut, arfininngornerit, sapaatit nalliuttullu ilanngunneqassanngillat.


## Nalliuttut tassaapput:

- |                               |                 |                          |
|-------------------------------|-----------------|--------------------------|
| ▶ Ukiutoqaaq                  | ▶ Påskip ullua  | ▶ Pinsip aappaa          |
| ▶ Ukiortaaq                   | ▶ Påskip aappaa | ▶ Inuiattut ullorsiorneq |
| ▶ Kunngit pingasut*           | ▶ Tussiarfik    | ▶ Juulliaaraq            |
| ▶ Sisamanngorneq illernartooq | ▶ Qilaliarfik   | ▶ Juullerujussuaq        |
| ▶ Tallimannorneq tannaartooq  | ▶ Pinsip ullua  | ▶ Juullip naggataa       |

\* Kunngit pingasuni ullup affaani nalliuttuusumi ulloq tamaat ilanngunneqassanngilaq.

## Akileraarutitigut nalinga – ilaannakortumik akiliunneqarluni angalanerit

Ilaannakortumik akiliunneqarluni angalanerit nalingi akiliunneqarluni angalanerit nalingisuulli nalinginnaasumik akileraaruserneqassapput, tak. § 19, imm. 2 aamma qulaani immikkoortoq 4-miittut.



## Ilaannakortumik akiliunneqarluni angalanerit naatsorsornissaannut assersuutit

### Assersuut 1

C Nuummi najugaqartoq pikkorissariartorluni sulingiffeqariartorlunilu ilaannakortumik akiliunneqarluni angalavoq. C ulloq 3. maj aallarpoq, ullorlu 13. maj uterluni. Angalanermi ulloq 5. aamma ulloq 10. maj pikkorissarfiupput. C ullut sinnerini sulingiffeqarpoq. Ullut angalaffiusut, arfininngornerit sapaatillu eqqaassanngikkaanni, angalaneq ullunik 7-inik sivirususeqarpoq. Taakkunannga ullut suliffiusut marluupput, ullullu sulingiffiusut 5-iullutik.

Angalanerup namminermt tunngasortaa 5/7-deliuvoq, taamaalillunilu aallaqqanerup 50 procentianit sivirusunerulluni, taamaattumik angalaneq ilaannakortumik akiliunneqarluni angalaneruvoq akileraaruteqaataasusaaq. Billetsip akia 8.000 koruuniuppat, taava angalanerup akileraarutitigut nalinga  $((5/7) \times 8.000=)$  5.714 koruuniussaaq. Namminermt tunngasortaa 1.000 koruuninit qaffasinneruvoq, taamaattumik akileraarutitigut nalinga 5.714 koruuniusoq C-p aningaasarsiaasa akileraaruteqaataasussat naatsorsorneranni ilanngunneqassaaq.

### Assersuut 2

D Ilulissani sulisuusoq, piffissami ulloq 2. maajimiit ulloq 28. maajimut ilaannakortumik akiliunneqarluni angalavoq. Angallavigineqarput Ilulissat – Kangerlussuaq – København – Oslo – København – Kangerlussuaq – Ilulissat. D ulluni 3. - 4. maj Københavni sulivoq. Oslomiinneq piffissami 5.-7. maj ulluni pingasuni ataatsimeersuarneruvoq.

Ullut angalaffiusut, arfininngornerit sapaatillu eqqaassanngikkaanni, ulluni 19-ini angalaneq ingerlanneqarpoq. Taakkunannga ullut 14-it feeriarfiupput, ullut 5-it suliffiullutik.

Ullunit 5-init siviruserusumik ataqatigiissumik feeriarneq ingerlanneqarpoq, aammalu angalaneq ilaannakortumik akiliunneqarluni angalaneruvoq akileraaruteqaataasusaaq. Angalanermut Ilulissat – Kangerlussuaq – København uterlugulu aningaasartuutit 12.000 koruuniuppata, angalanerup akileraaruteqaataasussartaa  $((14/19 \times 12.000 \text{ kr.})=)$  8.842 koruuniuvoq.

Angalanermut København – Oslo – København angalanermut aningaasartuutit inuussutissarsiorluni angalaneruvoq, taamaattumik angalanerup tassunga tunngasortaanut aningaasartuutit naatsorsuineri ilanngunneqartussaangillat.

Sulisoq Oslomiinnerminut uiggiullugu sulingiffeqarsimasuuppat, tassunga angalanermut aningaasartuutit aamma naatsorsuineri ilanngunneqartussaassagaluarput.

# PIFFISSAQ AKILERAARUSIIFFISSAQ

---

## **Ukioq aningaasarsiorfiusoq 2022**

Akiliunneqarluni angalanerup nalinga ukiumi aningaasarsiorfiusumi angalanerup pisiarineqarfiani aningaasarsiat akileraaruteqaataasussat naatsorsorneranni ilanngunneqassaaq, angalanerup ukiumi aningaasarsiorfiusumi kingusinnerusumi pinissaa apeqqutaatinnagu.

### *Assersuut*

---

Sulisoq ilaannakortumik akiliunneqarluni angalanissamik, 2022-mi martsimi ingerlanneqartussamik akuerineqarpoq. Ulluni marlunni inuussutissarsioneremut tunngasumik pikkorissarnissaq angalanerup siunertaraa. Sulisoq pikkorissarnerminut uiggiullugu sapaatit akunnerini marlunni sulinngiffeqarpoq. Angalanissaq sulisitsisumit ulloq 22. december 2021 pisiarineqarpoq. Piffissaq akileraarusiiffiususaaq 2021-miimmat angalaneq 2021-mi maleruagassat atuuttut malillugit suliarineqassaaq. Angalaneq ilaannakortumik akiliunneqarluni angalanertut akileraaruserneqassanngilaq, tassami tamanna pillugu maleruagassat aatsaat ukioq aningaasarsiorfiusoq 2022 aallarnerfigalugu atuuttermata.

## **Ukioq aningaasarsiorfiusoq 2023 taassumalu kingorna**

Akiliunneqarluni angalanerit ukioq aningaasarsiorfiusoq 2023 aallarnerfigalugu tassaalissapput aningaasarsiat A-t, tak. § 75, imm. 1, nr. 4. Piffissaq akileraarusiiffiususaaq tamatuma malitsigisaanik allanngortinneqanngilaq.

Sulisitsisup akiliunneqarluni angalanerit nalingisa akileraarutaat qaammammi, akileraarusiinissap atuutierfiani unerartissavai (pisunik ilutigiissitsineq).

# SULISITSISUP AKILIUNNEQARLUNI ANGALANERIT IL.IL. PILLUGIT PISUSSAAFFII

Akiliunneqarluni angalanerit § 19 b malillugu akileraaruteqaataasussamut aningaasartuutit akiliisoqarpat, sulisitsisup:

- Ukiumi akiliunneqarluni angalanerit akileraarutitigut nalingat § 19 b malillugu naatsorsussavaa
- Ukiup aningaasarsiorfiusup naanerata kingorna ukiumi januaarip qaammataa naatinnagu ukiup siuliani tamakkiisumik ilaannakortumilluunniit akiliunneqarluni angalanerit paasisutissiissutigissavai, tak. akileraaruserinermik ingerlatsineq pillugu Inatsisartut inatsisaanni § 30.

Akeqanngitsumik ajunngitsorsianik nalunaarutiginninnginneq akiliisitsinikkut pineqaatissiinermik malitseqarsinnaavoq.

Akiliunneqarluni angalanerit ukioq aningaasarsiorfiusoq 2023 aallernerfigalugu tassaalissapput aningaasarsiat A-t, sulisitsisut akileraarutit A-nik unerartitsinissamut aammalu sulisoqarnermut akitsuummik naatsorsuinissamut pisussaaffeqalernerannik malitseqartumik. Takuuk matuma kinguliani takussutissiaq.

## Ukioq aningaasarsiorfiusoq 2022

	Aningaasarsiat A-t	Ani-ngaa-sarsiat B-t	Akileraaruteqaataasusaanngitsoq	Sulisoqarnermut akitsuut	Nalunaarutiginnittusaaneq / immersugassaq
Akiliunneqarluni angalanerit		X		Naagga	Aap – ukiumoortumik A11
Ilaannakortumik akiliunneqarluni angalanerit		X	1.000 kr.-t tikillugit nalilik	Naagga	Aap – ukiumoortumik A11
Sulinngiffimmi akiliunneqarluni angalanerit		X	Ukiumoortumik sulinngiffimmi akiliunneqarluni angalaneq ataaseq	Naagga	Aap – ukiumoortumik A11
Atorfinikkiartorluni atorfimmillu soraarnermi angalanerit			Aap	Naagga	Naagga
Qanigisap perululluni napparsimanerani toquneraniluunniit angalaneq			Aap	Naagga	Naagga

## Ukioq aningaasarsiorfiusoq 2023 taassumalu kingorna

	Aningaasarsiat A-t	Ani-ngaa-sarsiat B-t	Akileraaruteqaataasusaanngitsoq	Sulisoqarnermut akitsuut	Nalunaarutiginnittusaaneq / immersugassaq
Akiliunneqarluni angalanerit	X			Aap	Qaammatikkaartumik – A1 Ukiumoortumik – A11
Ilaannakortumik akiliunneqarluni angalanerit	X		1.000 kr.-t tikillugit nalilik	Aap	Qaammatikkaartumik – A1 Ukiumoortumik – A11
Sulinngiffimmi akiliunneqarluni angalanerit	X		Ukiumoortumik sulinngiffimmi akiliunneqarluni angalaneq ataaseq	Aap	Qaammatikkaartumik – A1 Ukiumoortumik – A11
Atorfinikkiartorluni atorfimmillu soraarnermi angalanerit			Aap	Naagga	Naagga
Qanigisap perululluni napparsimanerani toquneraniluunniit angalaneq			Aap	Naagga	Naagga

# INNERSUUSSINERIT

---

Aningaasarsianit akileraarutit pillugit Inatsisartut inatsisaanni § 13, § 19 b, § 19 c, § 34, imm. 1, nr. 15 aamma § 75.

Akileraaruserinermik ingerlatsineq pillugu Inatsisartut inatsisaanni § 30.

Akileraartarnermut Aqutsisoqarfiup akiliunneqarluni sulinngiffimmi angalasarnerit akileraarusorneqartarnerinut ilitsersuutaa 25. april 2008-meersoq.



[WWW.AKA.GL](http://WWW.AKA.GL)

Akileraartarnermut Aqutsisoqarfik  
Intaleeqqap Aqqutaa nr. 1  
Postboks 1605  
3900 Nuuk